

# SUHANO

# YOHANES

## KAHAA PAKUNO

### Kaatono Wamba

Weo suha kahaa pakuno ini, Yohanes miina nabuhiea neano tamaka nokona wutono “Kamungkula neangkando umati”. Nopakatue ne seemie ina nepilino Lahata'ala bhe ana'ino. Weo patalando mie mande, suano seemie ina sakotu'uno, tamaka ka'ibahatinomo umati bhe mie marasaeano.

Nandoo haa honda dua nemesalono weo suha aini. Kabhao-bhaono, andoa tabeano sadhia dapomoa-moasi'ao. Kahaa iseno, daposi'ondo ne mie mpahaguru-guruno.

---

### Kalengkano suha 1:1-3

<sup>1</sup> Suha aini nomai'ao ne idi, kamungkula neangkando umati so hintu, wa'ina nepilino Lahata'ala bhe ana'ino kamoasi'aoku mpuu. Suano kaowu idi moasiangkoomu, tamaka kosasawindo mie mande'aono kabanarano Lahata'ala, doasiangkoomu dua. <sup>2</sup> Katioasi'amiu hampano kabanarano Lahata'ala neate weo totono lalontoomu bhe nafopobhai'ao ampa suhue dhamani. <sup>3</sup> Kabarakati, rahamati bhe katohopono dadi mai'ao ne Lahata'ala Amantoomu bhe Yesus Kristus Anano, sadhia napobhai bhe intaodiomu meateno weo kabanara bhe pomoa-moasi'ao.

### Damintahaki kafoina'uno Kristus 1:4-11

<sup>4</sup> Nowula mpuu laloku afetingke ana'imu siga'a dodadi doangkafi kabanara, pedamo pahinta netahimantoomu mai'ao ne Lahata'ala Amantoomu. <sup>5</sup> Aitu wa'ina, aesalo mpuu ne hintu sio-siomo intaodiomu ini dapomoa-moasi'ao. Nebuhiku ini suano

pahinta bu'oua, tamaka ingka dofetingkeemoomu mpini pakaparasaantoomu. <sup>6</sup>Dofomoasi'ao, ma'anano dodadi doangkafi pahintano Lahata'ala. Pahintano ingka fetingkeemoomu mpini pakaparasaamui, dadiomu weo kanini kaasi.

<sup>7</sup>Kaebuhi'aku peda aini hampano dobhahimo mpahaguru-guruno dolili te dhunia ini dofobhohe-bhohe'i. Andoa maitu miina da'umakui'e putae Yesus Kristus nomai we dhunia ini peda seemie manusia. Mie pedando na'a o fobhohe-bhohe'ino bhe kaewano Kristus. <sup>8</sup>Dadi'anomo posi'ondoomu bhahasaa nosali kahadhaa toka nepooli mani so hintimiu, tamaka tetewei umawae'omu kosekabhalae ponambo nefontaa-ntaano Lahata'ala. <sup>9</sup>Sasuka tapa mintahakino kafoina'uno Kristus tamaka nekapingkaane, miinamo nase'ise bhe Lahata'ala. Sasuka mintahakino kafoina'u ana'a nose'ise bhe Lahata'ala Ama bhe Anano. <sup>10</sup>Dadi'anomo ane bhe mie maino meowano kafoina'u tapa nefoina'u'aono Kristus, mie aitu koe tahimae'omu weo lambumiu, koemo dua fende'aaneomua. <sup>11</sup>Kapa'amo la'ae mende'aane, ingka kao-kaomo neala dua dawu weo habu modaino mie aitu.

### Kasongkono suha

1:12-13

<sup>12</sup>Nandoo nobhahi sepali'a so nefohato'aoku ne hintimiu, ampa mo kaowu naetaa pae abuhie ne suha. Aposahuna'ao amai adumongawikoomu maka daetula-tula dapowise-wisoomu, nosangka'ao ka'iantoomu.

<sup>13</sup>Nandoo dua kapakatuno salam mai'ao ne ana'ino bhahitiemu nepilino Lahata'ala.